

Na osnovu člana 16. stava 4. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj 7/10), na prijedlog Ureda za borbu protiv korupcije, Vlada Zeničko-dobojskog kantona, na 157. sjednici, održanoj dana 10.06.2022. godine, d o n o s i

ZAKLJUČAK

I.

Prihvata se Informacija o provođenju postupka preispitivanja vjerodostojnosti podataka u svjedodžbama/diplomama uposlenih u javnom sektoru, nosioca izvršne vlasti i savjetnika nosioca izvršne vlasti u Zeničko-dobojskom kantonu (revizija diploma), za izvještajni period od 31.05.2021. godine - do 31.01.2022. godine, koju je sačinio Tim Vlade Zeničko-dobojskog kantona za prevenciju i borbu protiv korupcije a koja čini sastavni dio ovog zaključka.

II.

Zaključak stupa na snagu danom donošenja.

Broj: 02-_____/22
Datum, 10.06.2022. godine
Zenica

PREMIJER

Mirnes Bašić

DOSTAVLJENO:

1x Uredu za borbu protiv korupcije,
1x Svim kantonalnim ministarstvima i drugim tijelima uprave,
1x Svim institucijama, putem resornih ministarstava,
1x Timu Vlade Zeničko-dobojskog kantona za prevenciju i borbu protiv korupcije,
putem Ureda,
1x a/a.

**Bosna i Hercegovina
Federacija Bosne i Hercegovine
Zeničko-dobojski kanton**

**Tim Vlade Zeničko-dobojskog kantona
za prevenciju i borbu protiv korupcije**

**INFORMACIJA
o provođenju postupka preispitivanja vjerodostojnosti podataka
u svjedodžbama/diplomama uposlenih u javnom sektoru,
nosioca izvršne vlasti i savjetnika nosioca izvršne vlasti
u Zeničko-dobojskom kantonu
(revizija diploma)**

Zenica, april 2022. godine

SADRŽAJ

SADRŽAJ.....	2
UVOD.....	3
1. Pravni osnov.....	3
2. Obuhvat revizije.....	4
3. Ciljevi revizije.....	4
4. Način provođenja revizije diploma u institucijama ZDK.....	4
5. Rezultati provođenje vjerodostojnosti diploma/svjedodžbi (revizije) u institucijama/ustanovama Zeničko-dobojskog kantona.....	5
6. Tabelarni prikaz za institucije/ustanove za izvještajni period: od 31.05.2021. godine – do 31.01.2022. godine.....	7
7. Pregled dostavljenih izvještaja po institucijama/organima Zeničko-dobojskog kantona... 	8
8. Tabelarni prikaz po izvještajnim periodima: izvještajni period zaključno sa 31.05.2021. godine i izvještajni period 31.05.2021. – 31.01.2022. godine.....	13
Zaključci i preporuke.....	14

UVOD

Aktom broj: 5-50-3-1125/17 od 15.05.2019. godine, Agencija za prevenciju i koordinaciju borbe protiv korupcije (u daljem tekstu: APIK) obratila se svim institucijama i tijelima za borbu protiv korupcije u Bosni i Hercegovini sa Inicijativom za pokretanje revizije diploma zaposlenih u javnim institucijama.

Agencija za prevenciju i koordinaciju borbe protiv korupcije kao državna antikorupcijska institucija u okviru svojih nadležnosti propisanih Zakonom o APIK-u ima zadatak da:

- identifikuje i eliminiše uzroke korupcije,
- utiče na lica da ne čine krivična djela u vezi sa korupcijom,
- vrši osiguravanje i unapređenje pravnog okvira za prevenciju korupcije,
- podiže svijest javnosti i stvara odnos netolerancije prema korupciji, te
- promoviše transparentan i odgovoran rad tijela i institucija u Bosni i Hercegovini,

Shodno članovima Zakona o APIK-u:

- čl. 7. (c) Antikorupcijski principi: transparentnost i javna kontrola,
- čl. 8. (e) Principi rada: kontinuitet na uspostavljanju i provođenju efikasnih mjera za prevenciju korupcije, njihovim kontinuiranim nadzorom,
- čl.9. Djelatnost: nadležna za prevenciju korupcije i koordinaciju borbe protiv korupcije u institucijama javnog i privatnog sektora kod nosilaca funkcija u zakonodavnoj, izvršnoj i sudskoj vlasti, te javnih službenika i zaposlenika, kao i policijskih službenika na svim nivoima vlasti.

Agencija za prevenciju i koordinaciju borbe protiv korupcije BiH (APIK) zbog konstantnog negativnog pisanja o lažnim diplomama u Bosni i Hercegovini, uputila je pomenutu Inicijativu za pokretanje revizije diploma zaposlenih u javnim institucijama svim antikorupcijskim tijelima u Bosni i Hercegovini da iniciraju proces revizije diploma za sve uposlene u tijelima i organima uprave (direkcijama, zavodima, agencijama) i javnim preduzećima u Bosni i Hercegovini.

1. Pravni osnov

Pored navedene inicijative APIK-a, da svi nivoi vlasti izvrše reviziju diploma, Vlada Zeničko-dobojskog kantona je na prijedlog Tima Vlade Zeničko-dobojskog kantona za prevenciju i borbu protiv korupcije, a na osnovu člana 16. stav 2. Zakona o Vladi Zeničko-dobojskog kantona - (Službene novine Zeničko-dobojskog kantona", broj 7/10) – Prečišćen tekst i Zaključka Vlade broj 02-06-807/19 od 16.01.2019. godine, kojim je usvojila Izvještaj o provođenju Akcionog plana za borbu protiv korupcije, na 30. sjednici, održanoj dana 22.11.2019. godine, donijela Odluku kojom se prihvata Inicijativa Tima Vlade Zeničko-dobojskog kantona za prevenciju i borbu protiv korupcije (u daljem tekstu Tim Vlade), za reviziju diploma nosioca izvršne vlasti, savjetnika nosioca izvršne vlasti, uposlenih u kantonalnim ministarstvima i drugim tijelima kantonalne uprave (u daljem tekstu državna služba), uposlenih u javnim ustanovama, zavodima, direkcijama i drugim organima čiji je osnivač Kanton ili se u potpunosti ili djelimično finansiraju iz Budžeta kantona, javnim preduzećima i privrednim društvima Zeničko-dobojskog kantona sa većinskim vlasničkim kapitalom (u daljem

tekstu: Institucije ZDK), a u skladu sa Inicijativom Agencije za prevenciju korupcije i koordinaciju borbe protiv korupcije da svi nivoi vlasti izvrše reviziju diploma.

2. Obuhvat revizije

Revizijom su obuhvaćeni:

- a) nosioci izvršnih funkcija i savjetnici nosioca izvršnih funkcija,
- b) državni službenici i namještenici,
- c) uposlenici kantonalnih institucija (uposleni u javnim ustanovama, zavodima, direkcijama i drugim organima čiji je osnivač Kanton ili se u cjelini ili djelimično finansiraju iz Budžeta Kantona, javnim preduzećima i privrednim društvima sa većinskim vlasničkim kapitalom),
- d) revizija diploma će biti izvršena u 158 tijela uprave i institucija Zeničko-dobojskog kantona,
- e) revizijom diploma će biti obuhvaćeno oko 11.500 uposlenih u institucijama ZDK.

3. Ciljevi revizije

Osnovni ciljevi revizije su:

- a) vratiti i jačati povjerenje građana u institucije Zeničko-dobojskog kantona,
- b) otkloniti bilo kakve sumnje i nedoumice o vjerodostojnosti diploma u Zeničko-dobojskom kantonu (za gore navedene institucije),
- c) Vlada ZDK će po prvi put izvršiti reviziju svih diploma za sve uposlene u institucijama u kojima je ona osnivač, ili se finansiraju iz budžeta što će dovesti do egzaktnije informacije da li unutar institucija (oko 11.500) postoje uposlenici koji imaju nevjerodostojne diplome za poslove koje obavljaju,
- d) poslati snažnu poruku opredijeljenosti Vlade ZDK i Tima za borbu protiv korupcije za učinkovitu i angažiranu borbu protiv korupcije.

4. Način provođenja revizije diploma u institucijama ZDK

Institucije ZDK će samostalno provesti postupak detaljne revizije diploma svih uposlenih u skladu sa Uputstvom Tima Vlade i Inicijativom za revizijom diploma kojom su utvrđene mjere i aktivnosti, njihovi nosioci, te materijalno-tehničke pretpostavke za efikasno provođenje.

Provođenje revizije podrazumijeva provjeru vjerodostojnosti podataka sadržanih u svjedodžbama/diplomama i to:

- utvrđivanje vjerodostojnosti diploma stečenih na visokoškolskim obrazovnim ustanovama,
- utvrđivanje vjerodostojnosti diploma/svjedodžbi stečenih u srednjoškolskim obrazovnim ustanovama i
- utvrđivanje vjerodostojnosti svjedodžbi stečenih u ustanovama osnovnog obrazovanja

Odluka, Inicijativa o reviziji diploma (provjeri vjerodostojnosti diploma) i Uputstvo za reviziju diploma u institucijama Zeničko-dobojskog kantona (provjera vjerodostojnosti diploma) objavljeni su na web strani Zeničko-dobojskog kantona (www.zdk.ba – dio „Aktivnosti Tima Vlade za borbu protiv korupcije“).

5. Rezultati provođenja vjerodostojnosti diploma/svjedodžbi (revizije) u institucijama/ustanovama Zeničko-dobojskog kantona

Na području Zeničko-dobojskog kantona postupkom revizije diploma/svjedodžbi obuhvaćeni su zaposlenici 35 (trideset i pet) institucija/ustanova i 102 osnovne i srednje škole i to:

1. URED PREMIJERA
2. STRUČNA SLUŽBA VLADE
3. SEKRETARIJAT ZA ZAKONODAVSTVO
4. STRUČNA SLUŽBA SKUPŠTINE
5. STRUČNA SLUŽBA ZA RAZVOJ I MEĐUNARODNE PROJEKTE
6. SLUŽBA ZA ZAJEDNIČKE POSLOVE
7. MINISTARSTVO ZA POLJOPRIVREDU ŠUMARSTVO I VODOPRIVREDU
8. MINISTARSTVO ZA PROSTORNO UREĐENJE, PROMET I KOMUNIKACIJE I ZAŠTITU OKOLINE
9. MINISTARSTVO ZA RAD, SOCIJALNU POLITIKU I IZBJEGLICE
10. MINISTARSTVO ZA OBRAZOVANJE, NAUKU, KULTURU I SPORT
11. MINISTARSTVO ZDRAVSTVA
12. MINISTARSTVO ZA PRAVOSUĐE I UPRAVU
13. MINISTARSTVO ZA BORAČKA PITANJA
14. MINISTARSTVO ZA PRIVREDU
15. MINISTARSTVO FINANSIJA
16. MINISTARSTVO UNUTRAŠNJIH POSLOVA
17. KANTONALNA DIREKCIJA ZA CESTE
18. AGENCIJA ZA PRIVATIZACIJU ZDK
19. JU SLUŽBA ZA ZAPOSŁJAVANJE ZDK
20. JU CENTAR ZA DJECU I ODRASLE OSOBE S POSEBNIM POTREBAMA
21. JZU ZAVOD ZA BOLESTI OVISNOSTI ZDK
22. ZAVOD ZDRAVSTVENOG OSIGURANJA
23. JU INSTITUT ZA ZDRAVLJE I SIGURNOST HRANE
24. JU KANTONALNA BOLNICA ZENICA
25. KANTONALNI ZAVOD ZA PRAVNU POMOĆ
26. ZAVOD ZA MEDICINU RADA I SPORTSKU MEDICINU
27. KANTONALNA DIREKCIJA ROBNIH REZERV
28. KANTONALNO PRAVOBRANILAŠTVO
29. KANTONALNA UPRAVA ZA ŠUMARSTVO
30. KANTONALNI ZAVOD ZA URBANIZAM I PROSTORNO UREĐENJE
31. JU PENZIONERSKI DOM SA STACIONAROM
32. KANTONALNA UPRAVA CIVILNE ZAŠTITE
33. KANTONALNA UPRAVA ZA INSPEKCIJSKE POSLOVE
34. ŠUMSKO PRIVREDNO DRUŠTVO ZAVIDOVIĆI
35. UNIVERZITET U ZENICI

Vlada Zeničko-dobojskog kantona je na svojoj 114. sjednici, održanoj dana 19.07.2021. godine, usvojila Informaciju o provođenju postupka preispitivanja vjerodostojnosti podataka u

svjedodžbama/diplomama uposlenih u javnom sektoru, nosioca izvršne vlasti i savjetnika nosioca izvršne vlasti u Zeničko-dobojskom kantonu (revizija diploma), za period 2020. godina i period januar-april 2021.

Nakon toga Tim Vlade Zeničko-dobojskog kantona je svim institucijama/organima uputio akt –„Obavijest“, broj: 02-34-10230-1/21 od 29.07.2021. godine, o provođenju preporuka iz predmetne Informacije kojim su određeni pravci za dalji nastavak procesa revizije:

- Sve ustanove iz vlastitih budžetskih sredstava, iz stavke Ugovorene i druge usluge, treba da izdvoje sredstva potrebna za plaćanja taksi koje svojim pravilnicima propisuju obrazovne ustanove, i što prije izvrše plaćanje i okončaju procese provjere diploma/svjedočanstava.
- Tim Vlade Zeničko-dobojskog kantona za prevenciju i borbu protiv korupcije će u narednih 6 (šest) mjeseci uspostaviti i redovno ažurirati elektronski Registar uposlenih, u kojem će jedan od podataka biti i podatak o provedenoj provjeri vjerodostojnosti podataka sadržanih u diplomi/svjedočanstvu.
- Obavezuju se svi rukovodioci da pri svakom novom upošljavanju obavljaju provjeru vjerodostojnosti diploma/svjedočanstava, te da izvještaj o svakoj izvršenoj provjeri dostave Timu Vlade za prevenciju i borbu protiv korupcije.
- Sve ustanove će dostaviti poimenične spiskove sa nazivom radnog mjesta i stručnom spremom na dan 22.11.2019. godine, i na dan 31.05.2021. godine, te tačan ukupan broj uposlenih na iste datume.
- Kantonalna bolnica Zenica će u narednom roku od 3 mjeseca izvršiti provjeru svih diploma/svjedočanstava stečenih i putem redovnog školovanja.
- Rukovodioci institucija Zeničko-dobojskog kantona urgirat će odgovore obrazovnih ustanova koje nisu dostavile odgovore, te kopiju urgencija dostaviti Timu Vlade, radi poduzimanja daljnjih koraka.
- Unutar institucija/ustanova će se osigurati kontinuitet u radu imenovanim koordinatorima jer su isti prošli adekvatne edukacije i obuke, tako da mogu značajno i kvalitetno doprinijeti prevenciji korupcije u svojim institucijama.

Kako je Tim Vlade zadužen za implementaciju i nadzor nad provođenjem antikorupcijskih politika, sve institucije/organi su bili u obavezi do 31.12.2021. godine, a shodno prethodno usvojenoj Informaciji, da informišu Tim Vlade i dostave svoje pojedinačne izvještaje o postupanju po naprijed navedenim mjerama i preporukama, te je Tim Vlade svim institucijama/organima uputio i Urgenciju broj: 02-34-10230-2/21 od 19.01.2022. godine, kako bi isti ispunio obavezu blagovremenog informiranja Vlade Zeničko-dobojskog kantona.

Nakon dostavljenih pojedinačnih izvještaja od strane (određenog broja) institucija/organa Zeničko-dobojskog kantona o postupku provjere vjerodostojnosti diploma/svjedodžbi svojih uposlenika, za izvještajni period od 31.05.2021. godine - do 31.01.2022. godine, Tim Vlade je pristupio analizi i obradi predmetnih izvještaja.

Nakon obrađenih podataka dostavljenih kroz pojedinačne izvještaje, od strane Tima Vlade, utvrđeno je da je postupkom provjere vjerodostojnosti (validnosti) diploma/svjedodžbi, za izvještajni period od 31.05.2021. godine – do 31.01.2022. godine, obuhvaćeno 1.131 (hiljadu stotinu trideset i

jedna) diploma/svjedodžba, od kojih je kod 873 (osam stotina sedamdeset i tri) potvrđena vjerodostojnost (validnost) istih, za 207 (dvije stotine sedam) diploma/svjedodžbi je postupak provjere još uvijek u toku, za 26 (dvadeset i šest) diploma/svjedodžbi nedostaju podaci za provjeru istih, a kod 25 (dvadeset i pet) diploma/svjedodžbi nije potvrđena vjerodostojnost (validnost) istih.

Sve diplome/svjedodžbe za koje obrazovne ustanove nisu potvrdile vjerodostojnost (validnost), proslijeđene su Tužilaštvu Zeničko-dobojskog kantona na dalje postupanje, te je jedna svjedodžba za koju obrazovna ustanova nije mogla u potpunosti potvrditi vjerodostojnost, od strane institucije predmet je upućen Ministarstvu unutrašnjih poslova Zeničko-dobojskog kantona na dalje postupanje i rješavanje.

6. Tabelarni prikaz za institucije/ustanove za izvještajni period: od 31.05.2021. godine – do 31.01.2022. godine.

	Izvještajni period
	31.05.2021.- 31.01.2022.
Ukupan broj provjera diploma/svjedodžbi	1.131
Potvrđena vjerodostojnost (validnost) diploma/svjedodžbi	873
Postupak provjere u toku	207
Uplata takse za provjeru	-
Nije potvrđena vjerodostojnost (validnost) diploma/svjedodžbi	25
Nema podataka – dio dokumentacije i matičnih knjiga uništen	26

U toku provjere, a prema dostavljenom izvještaju u kojem su navedeni samo brojevi pokazatelji, u izvještajnom periodu od 31.05.2021. godine – do 31.01.2022. godine, ustanovljeno je da u JP „Šumsko privredno društvo ZDK“ d.o.o. Zavidovići, za 26 (dvadeset i šest) diploma/svjedodžbi obrazovne ustanove nisu mogle izvršiti provjere diploma/svjedodžbi, iz razloga jer je tokom ratnih dejstava dio dokumentacije i matičnih knjiga uništen, kao i da za 25 (dvadeset i pet) diploma/svjedodžbi obrazovne ustanove nisu potvrdile vjerodostojnost (validnost) istih. Diplome/svjedodžbe za koje obrazovne ustanove nisu potvrdile vjerodostojnost (validnost), proslijeđene su Tužilaštvu Zeničko-dobojskog kantona na dalje postupanje.

Kroz izvršenu analizu i obradu predmetnih izvještaja, ustanovljeno je da određeni broj institucija/organa još nije okončao postupak provjere vjerodostojnosti (revizije) diploma, a kao razlog ne provedbe istog, između ostalog se navodi, da je određeni manji broj obrazovnih ustanova prestao sa radom, odnosno da je došlo do zatvaranja istih, zatim kašnjenje odgovora od strane obrazovnih ustanova na uredno upućene dopise (obrasce), te su u takvim slučajevima poslane urgencije nadležnim obrazovnim ustanovama, kao i da finansijska sredstva za provjeru vjerodostojnosti diploma/svjedodžbi, za koje se zahtjeva plaćanje takse, nisu planirana u Budžetima za 2021. godinu, i da su ista planirana i obezbijedena u Budžetima institucija/organa za 2022. godinu.

7. Pregled dostavljenih izvještaja po institucijama/organima Zeničko-dobojskog kantona

1. **Javno preduzeće Šumsko privredno društvo Zeničko-dobojskog kantona d.o.o. Zavidovići** – u svom izvještaju akt broj: 03-361/22 od 28.01.2022. godine, izvještava Tim Vlade da je JP pristupilo procesu provjere (revizije) diploma svih uposlenika društva, te da su obrazovne institucije potvrdile vjerodostojnost podataka za 684 (šest stotina osamdeset i četiri) diplome. Za 26 (dvadeset i šest) diploma koje su u dosadašnjem procesu revizije dobili, od strane škole su obaviješteni da nemaju podatak za određene diplome, jer je tokom ratnih dejstava dio dokumentacije i matičnih knjiga uništen. Za 165 (stotinu šezdeset i pet) diploma, nisu dobili povratne informacije škola, te su uputili urgencije za provjeru podataka. Kako navode, u ovaj broj ulaze i diplome radnika koji su radni odnos zasnovali u 2021. godini, kao i radnika koji su obrazovanje stekli u zemljama bivše SFRJ. Prema evidenciji koju vode, a vezano za dosadašnju reviziju, za 25 (dvadeset i pet) diploma obrazovne ustanove nisu mogle potvrditi vjerodostojnost. Diplome za koje su se obrazovne ustanove izjasnile o nevjerodostojnosti prosljedili su Tužilaštvu Zeničko-dobojskog kantona na dalje postupanje. U izvještaju su naveli, da je sam proces provjere usporavala i činjenica da je veliki broj diploma stečen u prijeratnom periodu, te da su se neke škole integrisale u jednu, neke su se razdvojile, da je veliki broj škola promijenio ime, a smjerovi za pojedina zanimanja se ne izučavaju više kao stručna već kao tehnička zanimanja i obrnuto, što im je rezultiralo slanjem obrazaca na više adresa. Obrazovne ustanove su im se žalile i na nedostatak podataka u obrascima koji su popunjavani u skladu sa uputstvima Tima Vlade, tražeći da im se dostave kopije diploma, što im je svakako dodatno usporilo sam proces revizije. U izvještaju se dalje navodi, da nakon što dobiju odgovore za diplome koje još uvijek nisu vraćene od obrazovnih ustanova, Timu Vlade će dostaviti podatke kao i popunjenu tabelu cjelokupne revizije svakog radnika.

2. **Kantonalna uprava za inspekcijske poslove** – u svom izvještaju akt broj: 18/01-30-10229-3/21 od 28.01.2022. godine, izvještava Tim Vlade, da je Kantonalna uprava za inspekcijske poslove izvršila preispitivanje vjerodostojnosti podataka u diplomama za 62 (šezdeset i dva) državna službenika i namještenika, te da su u toku postupaka preispitivanja vjerodostojnosti podataka za 22 (dvadeset i dva) državna službenika i namještenika, obzirom da je naknadno došlo do prijema novih državnih službenika i namještenika. Tabelu u kojoj su prikazali podatke, a koji se odnose na vjerodostojnost podataka u diplomama za 62 (šezdeset i dva) državna službenika i namještenika, su dostavili u ranijem izvještajnom periodu, te da će podatke koji se odnose na postupak preispitivanja vjerodostojnosti podataka u diplomama/svjedočbama za 22 (dvadeset i dva) državna službenika i namještenika, dostaviti nakon završenog postupka preispitivanja.

3. **Javna ustanova Kantonalna bolnica Zenica** - u toku izvještajnog perioda, Timu Vlade je dostavila dva akta. Akt broj: 01-04-5292/21 od 11.08.2021. godine, „*Odgovor na uputu Tima o provjeri diploma redovnih škola*“ kao odgovor na zaključke i preporuke Tima Vlade kojim je naloženo Kantonalnoj bolnici Zenica da u naredna 3 (tri) mjeseca od usvojene Informacije na sjednici Vlade Zeničko-dobojskog kantona, izvrši provjeru svih diploma/svjedočanstava stečenih i putem redovnog školovanja. U dostavljenom aktu, JU Kantonalna bolnica Zenica je obavijestila Tim Vlade da je rok od 3 (tri) mjeseca prekratak, s obzirom na broj zaposlenih u Ustanovi, te da u zadatom roku

neće moći adekvatno odgovoriti na postavljeni zadatak, te da se vanredne diplome svakako, redovno provjeravaju.

Aktom broj: 01-04-566/22 od 28.01.2022. godine, pod nazivom „*Podaci o provođenju postupka preispitivanja vjerodostojnosti podataka u svjedodžbama/diplomama*“ – obavještavaju Tim Vlade, da JU Kantonalan bolnica Zenica kontinuirano vrši provjeru diploma vanredno završenih škola, te da je u postupku provjera redovnih diploma, a obzirom na veliki broj zaposlenih u Ustanovi, da je prioritetna provjera vanrednih diploma. U prilogu dopisa je dostavljen i tabelarni prikaz o provjeri diploma u 2022. godini „*od rednog broja 109. zaključno sa rednim brojem 121*“. Iz dostavljenog tabelarnog pregleda se može konstatovati da je za 13 (trinaest) diploma/svjedodžbi dana 25.01.2022. godine i 28.01.2022. godine, upućen dopis obrazovnim ustanovama, bez navedenih odgovora od strane obrazovne ustanove. U izvještaju se navodi da u 2021. godini, nije bilo provjera vanrednih diploma, obzirom da iste nisu imali prilikom prijema kandidata.

4. **Javna Ustanova Zavod za medicinu rada i sportsku medicinu Zeničko-dobojskog kantona** – u svom izvještaju akt broj: 612/22 od 26.01.2022. godine, izvještava Tim Vlade da je Zavod izvršio provjeru diploma za još 4 (četiri) uposlenika, te da je u toku provjera vjerodostojnosti diploma za određeni broj zaposlenika (novoupisani i radnici za koje nije stigao odgovor obrazovnih ustanova), te da je poslana urgencija obrazovnim ustanovama, za dostavu podataka. U prilogu je dostavljena Excel tabela sa podacima izvršenih provjera za 4 (četiri) diplome/svjedodžbe. Zatim, aktom broj: 1798/22 od 02.03.2022. godine, izvještava Tim Vlade, da je izvršena provjera diploma za još 20 (dvadeset) radnika Zavoda, te da je sa ovom informacijom izvršila provjeru diploma za sve uposlenike zaključno sa 28.02.2022. godine, i konstatovala da su sve diplome vjerodostojne. Kao prilog, je dostavljena Excel tabela sa podacima izvršenih provjera za 20 (dvadeset) diploma/svjedodžbi.

5. **Ministarstvo za rad socijalnu politiku i izbjeglice** – u svom izvještaju akt broj: 09-34-10230-1/21 od 30.12.2021. godine, izvještava Tim Vlade da u pogledu izdvajanja Budžetskih sredstava na ime plaćanja taksi za izdavanja uvjerenja o vjerodostojnosti diploma nije realizovano, iz razloga što je jedini uposlenik za kojeg Ministarstvo nije izvršilo provjeru vjerodostojnosti diplome, a zbog ne plaćanja predmetne takse, penzionisan krajem 2021. godine. Kao razlog ne plaćanja takse se navodi, što u Budžetu za 2021. godinu, nisu bila planirana sredstva za te namjene, te da su ista planirana u Budžetu za 2022. godinu. Dalje navodi, da u pogledu preporuka Tima Vlade da rukovodioci institucija kontinuirano nastave provoditi proceduru revizije diploma za sve novoupisane, će biti realizirana u 2022. godini, budući da je u decembru 2021. godine, zaposlen jedan novoupisani u Ministarstvu.

6. **Ministarstvo unutrašnjih poslova Zenica - MUP** – u svom izvještaju akt broj: 08-01-02/2-02-1-1659-2/2021 od 12.10.2021. godine, izvještava Tim Vlade da je Ministarstvo provelo aktivnosti na provjeri diploma svojih zaposlenika o čemu je obavijestilo Tim Vlade putem konačnog izvještaja broj: 08-01-02/2-02-1-6410-12/20 od 10.12.2020. godine, te je u istom konstatovano da nije bilo diploma kojima se potvrđuje vjerodostojnost (odnosi se samo na podatke Ministarstva, bez podataka Uprave policije), da samo u dva slučaja nisu bile izvršene provjere iz razloga traženja plaćanja naknade od strane obrazovnih institucija. Aktivnosti vezano za provjeru i preostale 2 (dvije) diplome su okončali i potvrđeno je da su diplome vjerodostojne. Aktom broj: 08-01-02/03-2-108-1/2022 od 25.01.2022. godine, Ministarstvo izvještava Tim Vlade da je u periodu od 12.10.2021. godine do

danas, su provedene i okončane aktivnosti provjere 6 (šest) diploma/svjedodžbi kandidata (jedan državni službenik i pet namještenika), koji su nakon provedenog javnog konkursa/oglasa odabrani za prijem u radni odnos, te je od strane nadležne obrazovne ustanove potvrđeno da su iste vjerodostojne, kao i da je trenutno u toku provjera jedne diplome od strane SIPA-e za jednog kandidata koji je nakon provedenog javnog konkursa odabran za prijem u radni odnos, u svojstvu državnog službenika.

7. **Ministarstvo unutrašnjih poslova Zenica – Uprava policije** – u svom izvještaju akt broj: 08-02-04/3-02-1-6410-16/19 od 13.09.2021. godine, izvještava Tim Vlade da su policijski službenici Jedinice za profesionalne standarde, Uprave policije, MUP-a Zeničko-dobojskog kantona, postupili po preporukama Tima Vlade, kojom prilikom su u suradnji sa prosvjetnom inspekcijom Ministarstva obrazovanja, nauke kulture i sporta Hercegovačko-neretvanskog kantona, izvršili tematski inspekcijski nadzor na Nastavničkom fakultetu Univerziteta „Džemal Bijedić“ u Mostaru, Ekonomskom fakultetu Univerziteta „Džemal Bijedić“ u Mostaru i na Pravnom fakultetu Sveučilišta u Mostaru, kojima su obuhvaćene revizije 6 (šest) diploma (5-diploma VŠS i 1 diploma VSS) za 5 (pet) zaposlenika Uprave policije, MUP-a Zeničko-dobojskog kantona.

Na osnovu tematskih inspekcijskih nadzora na gore navedenim visokoškolskim obrazovnim ustanovama od 31.08., 01.09. i 02.09.2021. godine, se navodi da prosvjetni inspektor je utvrdio da su sve stečene diplome vjerodostojne i validne, te da se u arhivi Fakulteta nalaze dosije i provjeravanih zaposlenika, gdje postoje svi dokumenti vezani za tok studiranja, o čemu je Uprava policije obaviještena aktom Ministarstva obrazovanja, nauke kulture i sporta Hercegovačko-neretvanskog kantona, broj: 05-06-34-1524/21 od 02.09.2021. godine.

8. **Ministarstvo za obrazovanje, nauku, kulturu i sport Zeničko-dobojskog kantona** – u svom izvještaju akt broj: 10-05-34-17279-2-1-2/21 od 22.11.2021. godine, izvještava Tim Vlade da je Ministarstvo u prethodnom periodu izvršilo proces provjere vjerodostojnosti obrazovnih isprava svih radnika Ministarstva, o čemu je sačinilo i dostavilo izvještaj Timu Vlade. Dalje u izvještaju se navodi, da nakon što je Ministarstvo zaprimilo informaciju da je potrebno da organi kantonalne uprave izvrše i utvrđene aktivnosti radi provjera diploma i nosioca izvršne vlasti i savjetnika nosioca izvršne vlasti, je pristupilo utvrđenim aktivnostima za preostale 2 (dvije) obrazovne isprave. Nakon što su uputili zahtjeve visokoškolskim ustanovama koje su izdale diplome nosiocu izvršne vlasti i savjetniku nosioca izvršne vlasti, su zaprimili odgovore na iste, te utvrdili da su iste i vjerodostojne. Sa prethodnim izvršenim provjerama, napominju da je Ministarstvo okončalo u potpunosti proces revizije diploma svih radnika (službenika i namještenika) kao i nosioca izvršne vlasti i savjetnika nosioca izvršne vlasti, i da su sve provjerene diplome vjerodostojne.

9. **Ministarstvo za privredu Zeničko-dobojskog kantona** – u svom izvještaju akt broj: 04-04-1500/22 od 28.01.2022. godine, izvještava Tim Vlade da je Ministarstvo izvršilo provjeru vjerodostojnosti diplome za novog zaposlenika Ministarstva, te da je utvrdilo vjerodostojnost iste. Kao prilog je dostavljena Excel tabela sa unesenim podacima.

10. **Ministarstvo za prostorno uređenje, promet i komunikacije i zaštitu okoline** – u svom izvještaju akt broj: 12-30-2328/20 od 26.10.2021. godine, izvještava Tim Vlade da je Ministarstvo izvršilo reviziju diplome nosioca izvršne vlasti – Ministra, te da je potvrđena vjerodostojnost iste. Kao prilog je dostavljena potvrda o vjerodostojnosti diplome broj: 02-F-954/21 od 08.10.2021. godine, i popunjen obrazac I.

11. **Ministarstvo za pravosuđe i upravu Zeničko-dobojskog kantona** – u svom izvještaju akt broj 06-04/04-34-9462-3/21 od 08.11.2021. godine, izvještava Tim Vlade da je Ministarstvo postupilo po prethodnim preporukama Tima Vlade, te da je postupak provjere vjerodostojnosti (revizija) diploma/svjedodžbi okončan u prethodnom izvještajnom periodu.
12. **Ministarstvo zdravstva Zeničko-dobojskog kantona** – u svom izvještaju akt broj: 11-30-8405-3/21 od 01.07.2021. godine, izvještava Tim Vlade, te u prilogu dostavlja skraćeni tabelarni pregled sa podacima o izvršenoj reviziji za 3 (tri) diplome uposlenika, u kojoj je konstatovana vjerodostojnost (validnost) istih.
13. **Stručna služba za razvoj i međunarodne projekte** – u svom izvještaju akt broj: 19-34-10230-1-4/21 od 08.11.2021. godine, izvještava Tim Vlade da je u prethodnom periodu Stručna služba izvršila provjeru vjerodostojnosti diploma/svjedodžbi za 2 (dva) nova uposlenika, te da su iste u potpunosti vjerodostojne. Kao prilog je dostavljena Excel tabela sa unesenim podacima.
14. **Kantonalni zavod za pravnu pomoć** – u svom izvještaju akt broj: 20-02-34-10230-2-1/22 od 27.01.2022. godine, izvještava Tim Vlade da je Zavod u potpunosti izvršio provjeru revizije diploma/svjedodžbi za sve uposlenike, te da je utvrđena vjerodostojnost istih. Informišu, da je u prethodnom izvještajnom periodu Zavod izvršio provjeru vjerodostojnosti diploma/svjedodžbi za 2 (dva) uposlenika (namještenika), te da je izvršena provjera (revizija) diploma/svjedodžbi i za preostalih 6 (šest) zaposlenika Zavoda, te shodno navedenom, izvještaj predstavlja i konačan izvještaj o provjeri vjerodostojnosti diploma/svjedodžbi za svih 8 (osam) zaposlenika Zavoda. Kao prilog dostavljena je i Excel tabela sa unesenim podacima, kao i akt „provjera vjerodostojnosti diploma“ broj: 01-1082/20 od 30.12.2020. godine, nadležne obrazovne ustanove.
15. **Univerzitet u Zenici** – u svom izvještaju akt broj: 01-03-10-429/22 od 01.02.2022. godine, obavještava Tim Vlade da od posljednjeg izvještajnog perioda nije bilo nikakvih promjena. Za veoma mali broj diploma Univerzitet još nije dobio podatke, prije svega sa Univerziteta u Banja Luci i Univerziteta Džemal Bijedić u Mostaru, tj. još uvijek nije predviđen Budžet za provjeru diploma/svjedodžbi za koje su tražena finansijska sredstva.
16. **Stručna služba Skupštine** – u svom izvještaju akt broj: 01-34-10230-2/21 od 21.01.2022. godine, izvještava Tim Vlade da je Stručna služba Skupštine Zeničko-dobojskog kantona izvršila provjeru vjerodostojnosti diploma za sve državne službenike i namještenike, o čemu je Tim Vlade redovno izvještavala kroz izvještaje u prethodnom izvještajnom periodu.
17. **JU Institut za zdravlje i sigurnost hrane Zenica** – u svom izvještaju akt broj: 02-275/22 od 26.01.2022. godine, izvještava Tim Vlade da je Institut u proteklom periodu više puta dostavljao popunjene tabele o izvršenoj reviziji diploma, te da se od tada nije ništa promijenilo.

18. **Kantonalna uprava za šumarstvo Zeničko-dobojskog kantona** - putem e-maila je dostavila obavještenje Timu Vlade o provedenom postupku preispitivanja vjerodostojnosti svjedodžbi/diploma uposlenika te Uprave. Kao prilog je dostavljena Excel tabela sa unesenim podacima, iz koje se može konstatovati da su izvršene provjere i da je utvrđena vjerodostojnost diploma/svjedodžbi za svih 77 (sedamdeset i sedam) zaposlenika te Uprave.

19. **JU Služba za zapošljavanje Zeničko-dobojskog kantona** - putem e-maila je dostavila dopunjenu Excel tabelu revizije diploma koju je izvršila ta Ustanova, a koja predstavlja i dopunu tabele iz prethodnog izvještajnog perioda, uz napomenu da je jednom uposleniku prestao radni odnos dana 10.11.2021. godine, te da je prekinut postupak provjere (revizije) diplome za tog uposlenika. Iz dostavljene popunjene tabele se može konstatovati, da su izvršene provjere (revizija) za 25 (dvadeset i pet) zaposlenika, od kojih je za 22 (dvadeset i dva) zaposlenika izvršena provjera i utvrđena vjerodostojnost diploma/svjedodžbi, dok za 3 (tri) zaposlenika nije izvršena provjera, pošto obrazovna ustanova za provjeru istih zahtjeva uplatu takse.

20. **JU Penzionerski dom sa stacionarom Zeničko-dobojskog kantona** – u svom izvještaju akt broj: 3563/2021 od 16.11.2021. godine, izvještava Tim Vlade da provjera vjerodostojnosti podataka iz svjedodžbe za jednog uposlenika još nije završena, te da je predmet upućen Ministarstvu unutrašnjih poslova Ze-do kantona na dalje postupanje i rješavanje, te očekuju odgovor po istom. U prilogu izvještaja je dostavljen i tabelarni pregled provjere vjerodostojnosti podataka diploma/svjedodžbi za period april-novembar 2021. godine, iz kojeg se može konstatovati da je izvršena provjera za 7 (sedam) zaposlenika te Ustanove, da je utvrđena vjerodostojnost diploma/svjedodžbi za 6 (šest) zaposlenika, dok za 1 (jednog) zaposlenika provjera je u toku. U aktu broj: 651/2022. godine od 02.03.2022. godine, JU Penzionerski dom sa stacionarom Zeničko-dobojskog kantona, izvještava Tim Vlade, da je u decembru 2021. godine, vršena provjera vjerodostojnosti podataka za novo lice koje je uposleno u Ustanovi u drugoj polovini novembra 2021. godine, te je od strane obrazovne ustanove potvrđena vjerodostojnost podataka iz svjedodžbe uposlenog lica.

21. **Stručna služba Vlade** – u svom izvještaju akt broj: 02-1-34-1511-2/22 od 15.02.2022. godine, izvještava Tim Vlade da su izvršene provjere vjerodostojnosti/validnosti diploma/svjedodžbi za 2 (dva) uposlenika, te da je potvrđena vjerodostojnost istih. U prilogu akta su dostavljeni i popunjeni Obrasci za utvrđivanje vjerodostojnosti diploma/svjedodžbi.

22. **Služba za zajedničke poslove** – u svom izvještaju akt broj: 14-30-1696-39/20 od 10.02.2022. godine, izvještava Tim Vlade da je izvršena provjera vjerodostojnosti svjedodžbe za 1 (jednog) uposlenika, te da je utvrđena vjerodostojnost/validnost iste. U prilogu akta je dostavljen i popunjen Obrazac II za utvrđivanje vjerodostojnosti predmetne svjedodžbe.

23. **Zavod zdravstvenog osiguranja Zeničko-dobojskog kantona** – u svom izvještaju akt broj: 03-1455/22 od 28.01.2022. godine, izvještava Tim Vlade da je Zavod zdravstvenog osiguranja ZDK izvršio provjeru vjerodostojnosti podataka u svjedodžbama/diplomama svojih uposlenika, i o tome

izvijestio Tim Vlade u prethodnom izvještajnom periodu aktom broj: 01-30-8126/20 od 28.07.2020. godine. Dalje, u izvještaju se navodi, da aktivnosti provjere vjerodostojnosti podataka u svjedodžbama/diplomama novozaposlenih radnika su nastavljene kontinuirano, i u prilogu istog je dostavljena tabela sa provjerama za novoupisane radnike i radnike za koje su podatke od obrazovnih institucija dobili naknadno. Iz dostavljene tabele se može konstatovati da u odjeljku tabele „Dopuna tabele revizija diploma broj: 02-05-17279/19 od 22.11.2019. godine“ su dostavljeni podaci za 13 (trinaest) zaposlenika, te u odjeljku tabele „Tabela vjerodostojnosti diploma/svjedočanstava novoupisanih radnika za period 31.12.2021.godine“ su dostavljeni podaci za 14 (četrnaest) zaposlenika. Iz dostavljenih podataka prikazanih u tabelama se može konstatovati da su diplome/svjedočanstva vjerodostojne.

8. Tabelarni prikaz po izvještajnim periodima: izvještajni period zaključno sa 31.05.2021. godine i izvještajni period 31.05.2021. -31.01.2022. godine

	Izvještajni period		
	Zaključno sa 31.05.2021.	31.05.2021.-31.01.2022.	Ukupno
Ukupan broj provjera diploma/svjedodžbi	7.338	1.131	8.469
Potvrđena vjerodostojnost (validnost) diploma/svjedodžbi	7.166	873	8.039
Postupak provjere u toku	129	207	-
Uplata takse za provjeru	35	-	35
Nije potvrđena vjerodostojnost (validnost) diploma/svjedodžbi	8	25	33
Nema podataka – dio dokumentacije i matičnih knjiga uništen	-	26	26

U dosadašnjem toku postupka preispitivanja vjerodostojnosti podataka u diplomama/svjedodžbama (revizija), a koji obuhvata dva izvještajna perioda, izvršena je provjera za 8.469 (osam hiljada četiri stotine šezdeset i devet) diploma/svjedodžbi, od kojih je potvrđena vjerodostojnost za 8.039 (osam hiljada trideset i devet) diploma/svjedodžbi, za 26 (dvadeset i šest) diploma/svjedodžbi obrazovne ustanove nisu mogle izvršiti provjere iz razloga jer je tokom ratnih dejstava dio dokumentacije i matičnih knjiga je uništen, dok za 33 (trideset i tri) diplome/svjedodžbe obrazovne ustanove nisu mogle potvrditi vjerodostojnost (validnost) istih.

Zaključci i preporuke

U skladu sa iznesenim podacima u ovoj Informaciji, a sa ciljem istraživanja na provjeri vjerodostojnosti podataka koje sadrže diplome/svjedočanstva, predlažemo da zaključci u okviru ove informacije budu obavezujući za sve institucije.

Zaključak I

Sve ustanove iz vlastitih budžetskih sredstava, iz stavke Ugovorene i druge usluge, kontinuirano da planiraju i izdvajaju sredstva potrebna za plaćanja naknada koje potražuju obrazovne ustanove, sa ciljem provođenja provjere diploma/svjedočanstava i nastave sa aktivnostima revizije diploma.

Zaključak II

Da Tim Vlade za prevenciju i borbu protiv korupcije / Ured za borbu protiv korupcije u narednom periodu uspostavi i redovno ažurira elektronski Registar uposlenih, u kojem će jedan od podataka biti i podatak o provedenoj provjeri vjerodostojnosti podataka sadržanih u diplomi/svjedočanstvu,

Zaključak III

Da se pri svakom novom upošljavanju nastavi sa praksom provjere vjerodostojnosti diploma/svjedočanstava, te da se izvještaj o izvršenoj provjeri dostavljaju Timu Vlade/Uredu za borbu protiv korupcije.

Zaključak IV

Da rukovodioci institucija Zeničko-dobojskog kantona urgiraju odgovore obrazovnih ustanova koje nisu dostavile odgovore, te da kopiju urgencija dostave Timu Vlade/Uredu za borbu protiv korupcije, radi poduzimanja daljnjih koraka.

Sekretar po ovlaštenju

Ureda za borbu protiv korupcije

Dževad Fejzić